



جابتن مفتي نكري فهغ

قوله تعالى:
فَسَأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ

السلام عليكم ورحمة الله وبركاته

Soalan :

Assalamualaikum.Saya ingin bertanya.Adik saya menanggung hutang beribu ringgit untuk berniaga. Namun perniagaan berkenaan tidak wujud dan adalah tipu helah 'scammer'.

Soalan saya :

Saya ada dividen kwsp dari akaun konvensional (bagi tahun sebelum ditukar ke simpanan syariah) yang perlu dibersihkan.

Bolehkah saya menggunakan dividen tidak patuh syariah tersebut bagi melunaskan hutang adik saya.

Sekian. Mohon pencerahan dari pihak tuan.

Sekian. Terima kasih.

Jawapan :

وَعَلَيْكُمْ السَّلَامُ وَرَحْمَةُ اللَّهِ وَبَرَكَاتُهُ

Alhamdulillah, bersyukur kita ke hadrat Allah SWT, selawat dan salam ke atas Nabi besar junjungan kita Muhammad SAW, keluarga, sahabatnya dan mereka-mereka yang mengikuti segala sunnah Nabi Muhammad SAW sehingga ke hari kiamat. Terima kasih kepada puan di atas soalan yang telah diajukan kepada kami.

Hukum menggunakan **dividen tidak patuh syariah** bagi **melunaskan hutang adik puan** adalah **haram hukumnya kerana ianya termasuk dalam harta yang tidak patuh syariah**. Hal ini diperintahkan oleh Allah SWT dalam surah al-Maidah ayat 100:

قُلْ لَا يَسْتَوِي الْخَبِيثُ وَالطَّيِّبُ وَلَوْ أَعْجَبَكَ كَثْرَةُ الْخَبِيثِ فَاتَّقُوا اللَّهَ يَا أُولِي الْأَلْبَابِ لَعَلَّكُمْ تُفْلِحُونَ

Maksudnya: *"Katakanlah (Muhammad), "Tidaklah sama yang buruk dengan yang baik, meskipun banyaknya keburukan itu menarik hatimu, maka bertakwalah kepada Allah wahai orang-orang yang mempunyai akal sehat, agar kamu beruntung."*

Sheikh Abdul Rahman Bin Naser Al-Saudi ataupun dikenali dengan nama Al-Saudi dalam tafsirnya menukilkan bahawa " لَا يَسْتَوِي الْخَبِيثُ وَالطَّيِّبُ " merangkumi semua keadaan, maka tidak sama dengan iman dan kufur, tidak sama taat dan maksiat, tidak sama ahli syurga dan neraka, tidak sama amalan yang buruk dan yang baik dan tidak sama harta yang halal dan haram.

Menurut keputusan Mesyuarat Jawatankuasa Perunding Hukum Syarak Negeri Pahang Kali Ke-1/2009 pada 27 Februari 2009:

Di dalam Islam harta-harta yang diperolehi dengan cara yang tidak mematuhi syariah seperti riba, gharar, perjudian, penipuan, rompakan, rampasan, rasuah dan seumpamanyaq adalah haram dan tidak boleh digunakan untuk manfaat dan kepentingan diri sendiri serta perlu dibersihkan melalui kaedah-kaedah berikut:

1. Diserah kepada Baitulmal untuk masalah-masalah umum umat Islam seperti membiayai pembinaan atau penyelenggaraan jambatan, jalan, tandas dan seumpamanya
2. Diserah kepada golongan fakir ; atau
3. Jika harta tersebut harta rompak, curi dan seumpamanya, maka harta tersebut perlu diserahkan semula kepada pemiliknya. Jika pemiliknya telah meninggal dunia atau tidak dapat dijumpai, maka harta tersebut mestilah dikembalikan kepada ahli warisnya. Sekiranya tidak dapat diketahui pemilik atau ahli waris pemilik, maka harta tersebut hendaklah diserahkan ke Baitulmal.

Secara kesimpulannya, bagi menjawab persoalan yang dikemukakan oleh puan. Ingin kami ringkaskan bahawa **dividen kwsp dari akaun konvensional adalah haram** kerana mengandungi unsur-unsur yang tidak dibenarkan oleh syara' seperti riba, *gharar* dan *maisir*. Oleh itu, harta yang diperoleh daripada sumber yang haram perlu dibersihkan seperti digunakan untuk tujuan *masalah ammah* dan diberikan kepada fakir miskin . Justeru itu, jabatan ini menyarankan bahawa adik puan boleh memohon bantuan zakat di bawah Majlis Ugama Islam Negeri bagi asnaf *al-gharimin* iaitu golongan yang layak menerima bantuan zakat atas faktor hutang yang dibenarkan oleh syara'. Kami juga menasihatkan puan agar segera bertaubat di atas kesalahan yang dilakukan dan tidak mengulanginya lagi. Kami juga berharap agar puan menjauhi perkara-perkara yang menjurus kepada kemungkaran Allah SWT. Semoga apa yang disampaikan dapat memberi kefahaman yang jelas buat puan dan Allah sentiasa memudahkan segala urusan puan. Amin Ya Rabbal Alamin.

Sekian, Wassalam.

Rujukan

- 1) Al-Quran Dan Terjemahan.
- 2) Yusuf al-Qardhawi, *Fatwa Muasirah*.
- 3) Imam Nawawi, *Majmu' Syarh Al Muhazzab*.
- 4) Abdul Rahman Bin Naser Bin Abdullah Al-Saadi, Tafsir al-Karem al-Rahman Fil Tafsir Kalam al-Mannan.
- 5) https://reports.muip.gov.my/zakatportal/?page_id=3131